

Directivanan di scol "hopi satisfecho cu reunion fructifero" cu formador Eman

SKOA ta opta pa un solo Minister pa enseñansa

ORANJESTAD (AAN): Delegacion di SKOA, Stichting Katholiek Onderwijs Aruba, a sali satisfecho di reunion cu Formador Mike Eman. Pa mas cu un siman caba formador Eman y su team ta reuniendo cu diferente gremio, sindicato, y otro instancianan di sector publico y priva. Esaki den cuadro di formacion di un Gobierno nobo despues di e eleccionnan parlamentario di dia 27 di september ultimo.

"Hopi satisfecho," tabata e prome palabranan di Josette Daal, directora di SKOA, kende a forma parti di e delegacion. El a sigui bisa cu, "e encuentro tabata hopi amabel, unda a intercambia di ideanan. SKOA a haya oportunidad pa trece tur su preocupacionnan dilanti". Formador Eman a reuni cu e diferente directivanan di scol riba e prome dia di siman. Preocupacionnan di SKOA ta mas riba e estructura, falta di personal den Departamento di Enseñansa y experticionan cu lo kier tin internamente, sin cu esaki mester costa hopi placa.

No solamente SKOA a ricibi informacion di formador y presenta su idea y preocupacionnan, pero a probecha pa duna un splicacion con e fundacion aki cu ta maneja scolnan catolico ta hinca den otro y ta funciona. A discuti e pensamiento pa bin cu un organo madre di comision di mayornan y e opvang pa muchanan mas grandi despues di scol. E temanan aki a haya atencion di formador cu ta haya esaki un parti importante den desarojo di e generacion nobo di hobennan na Aruba. Loke cu SKOA a enfoca hopi riba dje ta cu e lo kier mira un Minister encarga cu e cartera di enseñansa so.

E encuentronan cu e diferente directivanan cu ta maneja scolnan na Aruba ta importante, principalmente den formacion di e maneho pa cu enseñansa den e proximo cuatro aña. SKOA tin na su encargo rond di 10 mil estudiante y esaki ta mas o menos 85% di e scolnan na Aruba. "Nos a sali hopi satisfecho di e reunion cu Formador, kende a priminti cu lo sigui papia riba tipo di topiconan

asina cu e Minister nobo di Enseñansa," Daal a expresa.

Colegio Arubano, un scol cu ta prepara hobennan cu kier sigui nan estudio avansa den exterior, ta cay bou responsabilidad di SMOA (Stichting Middelbaar Onderwijs Aruba), presidi pa René Kan. Den e reunion cu formador Eman, SMOA a splica riba e cambio cu a keda introduci cu actualmente tin un Consejo di Supervision, mientras cu e rector y con-rector ta den e directiva nobo. "E mensahe cu nos kier pa formador duna e Minister nobo ta pa nos traha e proximo añanan riba e topiconan cu nos a discuti," Kan a expresa. Ta trata aki di e covenant firma cu Hulanda, cu ta exige cierto cambionan cu mester wordo haci den leynan. E ta nifica cu cierto decisionnan mester wordo tuma e aña'ki. Ta papia di shete enbes di seis vak den cual ta haci examen



awor. Pero tambe a papia di construccion di e scol nobo HAVO/MAVO pa Noord y si ta bon pa reparti e trabou riba cual nan ta bay concentra: idioma Hulandes y Ingles, dependiendo di unda e hoben kier bay studia. Na final SMOA tambe a haci un apelacion riba formador pa bini cu un Minister di Enseñansa cu por concentra riba un aspecto asina importante

pa Aruba.

E ultimo grupo di sector di enseñansa cu a reuni cu formador dialuna tabata e representantenan di SPCOA (Stichting Protestants Christelijk Onderwijs Aruba), cual delegacion ta consisti di Edward 'Benky' Fowler y Frank Meijer, kendenan ta mes satisfecho cu e otro directivanan y a conclui cu e reunion tabata "hopi posi-

tivo, y mi ta wak e siguiente cuatro añanan ta hopi fructifero," Meijer a bisa na salida di e encuentro.

A pidi pa sigui pone atencion riba edificionan, subsidio, relacion di cooperacion, uzo di scolnan mas optimal, principalmente den oranan di merdia. SPCOA, cu a wordo funda na 1955 y tin seis scol bou su encargo, a haya cu e reunion a bay tremendo.